

OFFERYNNAU STATUDOL CYMRU

**2007 Rhif 1708 (Cy.147)**

**ANIFEILIAID, CYMRU**

IECHYD ANIFEILIAID

Gorchymyn Heidiau Bridio  
Dofednod a Deorfeydd (Cymru) 2007

*Wedi'i wneud* - - 13 Mehefin 2007  
*Yn dod i rym* - - 30 Mehefin 2007

Mae Gweinidogion Cymru, drwy arfer y pwerau a roddwyd gan adrannau 1 ac 8 o Ddeddf Iechyd Anifeiliaid 1981(1) ac a freiniwyd ynddynt bellach, yn gwneud y Gorchymyn a ganlyn:

**RHAN 1**

Cyflwyniad

**Enwi, cychwyn a chymhwyso**

1.—(1) Enw'r Gorchymyn hwn yw Gorchymyn Heidiau Bridio Dofednod a Deorfeydd (Cymru) 2007.

(2) Daw'r Gorchymyn hwn i rym ar 30 Mehefin 2007.

(3) Mae'r Gorchymyn hwn yn gymwys o ran Cymru.

**Dehongli**

2.—(1) Yn y Gorchymyn hwn—

mae “adeilad” (“*building*”) yn cynnwys cwt, ac unrhyw ran o adeilad y mae ganddi ei system awyru ei hun ac y mae wedi'i gwahanu oddi wrth rannau eraill o'r adeilad gan bared solet; ystyr “bridiwr cig” (“*meat breeder*”) yw dofeddyn a gedwir i gynhyrchu wyau ar gyfer eu gori a'u deor i gynhyrchu cywion—

(a) a gaiff eu magu i gynhyrchu cig i'w fwyta gan bobl, neu

(1) 1981 p.22. Trosglwyddwyd swyddogaethau a roddwyd o dan Ddeddf 1981 i Gynulliad Cenedlaethol yn rhinwedd O.S. 1999/672 ac O.S. 2004/3044 ac maent yn arferadwy gan Weinidogion Cymru yn rhinwedd paragraff 30 o Atodlen 11 i Ddeddf Llywodraeth Cymru 2006.

(b) y caiff eu hepil eu magu i gynhyrchu cig i'w fwyta gan bobl;  
 ystyr “cyw” (“*chick*”) yw aderyn sydd yn iau na 72 awr ac nad yw wedi'i fwydo;  
 ystyr “dodwywr fridiwr” (“*layer breeder*”) yw dofednyn a gedwir er mwyn cynhyrchu wyau ar gyfer eu gori a'u deor i gynhyrchu cywion—

(a) a gaiff eu magu i gynhyrchu wyau i'w bwyta gan bobl, neu

(b) y caiff eu hepil eu magu i gynhyrchu wyau i'w bwyta gan bobl;

ystyr “dofednod” (“*poultry*”) yw ffowls domestig, twrcïod, gwyddau a hwyaid;

ystyr “haid” (“*flock*”) yw dofednod o'r un statws iechyd â'i gilydd, a gedwir ar yr un daliad neu yn yr un caeade, sy'n un uned epidemiolegol ar ei phen ei hun, ac sy'n cynnwys, yn achos dofednod a gaiff eu lletya, bob aderyn sy'n rhannu'r un gofod awyr;

ystyr “haid fridio” (“*breeding flock*”) yw haid a gedwir ar gyfer cynhyrchu wyau ar gyfer eu gori;

ystyr “labordy a gymeradwywyd” (“*approved laboratory*”) yw labordy a gymeradwywyd gan Weinidogion Cymru at ddibenion y Gorchymyn hwn;

ystyr “meddiannydd” (“*occupier*”), mewn perthynas ag unrhyw ddeorfa neu ddaliad, yw'r person sydd â gofal y ddeorfa neu'r daliad.

(2) Mae unrhyw gyfeiriad at offeryn Cymunedol yn gyfeiriad at yr offeryn hwnnw fel y'i diwygir o dro i dro.

## Yr awdurdod cymwys

3. Gweinidogion Cymru yw'r awdurdod cymwys at ddibenion—

(a) Rheoliad y Comisiwn (EC) Rhif 1003/2005 sy'n rhoi ar waith Reoliad (EC) Rhif 2160/2003 o ran targed Cymunedol ar gyfer gostwng nifer yr achosion o seroteipiau salmonela penodol mewn heidiau bridio o *Gallus gallus* a Rheoliad (EC) Rhif 2160/2003(2) sy'n ei ddiwygio (y cyfeirir ato, yn y Gorchymyn hwn, fel “Rheoliad y Comisiwn”); a

(b) Rheoliad y Comisiwn (EC) Rhif 1177/2006 sy'n rhoi ar waith Reoliad (EC) Rhif 2160/2003 Senedd Ewrop a'r Cyngor o ran gofynion ar gyfer defnyddio dulliau rheoli penodol yn fframwaith y rhaglenni cenedlaethol ar gyfer rheoli salmonela mewn dofednod(3) (y cyfeirir ato, yn y Gorchymyn hwn, fel “Rheoliad y Comisiwn 1177/2006”).

## RHAN 2

### Hysbysu am ddeorfeydd a heidiau bridio

#### Hysbysu am ddeorfeydd

4.—(1) Rhaid i feddiannydd deorfa ddofednod â chyfanswm capasiti deor o 1000 neu fwy o wyau roi'r wybodaeth a geir yn Atodlen 1, paragraff 1 i Weinidogion Cymru—

(a) o fewn tri mis ar ôl i'r Gorchymyn hwn ddod i rym; neu

(b) yn achos y cyfryw ddeorfa a sefydlir ar ôl y dyddiad y daw'r Gorchymyn hwn i rym, o fewn tri mis ar ôl i'r ddeorfa gael ei sefydlu.

---

(2) OJ Rhif L 170, 1.7.2005, t.12. Mae'r Rheoliad hwn yn rhychwantu'r AEE trwy gyfrwng Penderfyniad Cyd-bwyllgor yr AEE Rhif 101/2006 sy'n diwygio Atodiad I (Materion milfeddygol a ffytoiechydol) i Gytundeb AEE (OJ Rhif L333, 30.11.2006, t.6).

(3) OJ Rhif L 212, 2.8.2006, t.3.

(2) Rhaid i'r meddiannydd hysbysu Gweinidogion Cymru o unrhyw newid i'r wybodaeth honno neu unrhyw ychwanegiad ati a hynny o fewn tri mis ar ôl gwneud y newid neu'r ychwanegiad.

(3) Nid yw'r erthygl hon yn gymwys i unrhyw feddiannydd sydd wedi hysbysu Gweinidogion Cymru o'r wybodaeth honno o dan unrhyw ddeddfiad arall.

### **Hysbysu am heidiau bridio**

5.—(1) Rhaid i feddiannydd daliad lle y cedwir un neu fwy o heidiau bridio o 250 o leiaf o ddofednod o unrhyw un rhywogaeth unigol roi'r wybodaeth a geir yn Atodlen 1, paragraff 2 i Weinidogion Cymru —

- (a) o fewn tri mis ar ôl i'r Gorchymyn hwn ddod i rym; neu
- (b) yn achos y cyfryw ddaliad a sefydlir ar ôl y dyddiad y daw'r Gorchymyn hwn i rym, o fewn tri mis ar ôl sefydlu'r daliad.

(2) Rhaid i'r meddiannydd hysbysu Gweinidogion Cymru o unrhyw newid i'r wybodaeth honno neu unrhyw ychwanegiad ati a hynny o fewn tri mis ar ôl gwneud y newid neu'r ychwanegiad.

(3) Nid yw'r erthygl hon yn gymwys i unrhyw feddiannydd sydd wedi rhoi'r wybodaeth honno i Weinidogion Cymru o dan unrhyw ddeddfiad arall.

## **RHAN 3**

### Rheoli salmonela mewn *Gallus gallus*

#### PENNOD 1

#### Dyletswyddau meddiannydd

### **Cymhwyso Pennod 1**

6. Mae'r Bennod hon yn gymwys mewn perthynas ag unrhyw ddaliad lle y cedwir un neu fwy o heidiau bridio o 250 o leiaf o ffowls domestig o'r rhywogaeth *Gallus gallus* ac mae unrhyw gyfeiriad yn y Bennod hon at feddiannydd yn gyfeiriad at feddiannydd y cyfryw ddaliad.

### **Hysbysu bod heidiau bridio wedi cyrraedd**

7.—(1) Rhaid i'r meddiannydd hysbysu Gweinidogion Cymru o'r dyddiad y disgwylir i bob haid fridio o 250 o leiaf o ffowls domestig o'r rhywogaeth *Gallus gallus* gyrraedd y daliad.

(2) Rhaid ei hysbysu o leiaf ddwy wythnos cyn y dyddiad y disgwylir i'r haid gyrraedd.

### **Hysbysu o symud ymlaen i'r cam dodwy etc.**

8.—(1) Rhaid i'r meddiannydd hysbysu Gweinidogion Cymru o'r dyddiad y mae'n disgwyl i bob haid fridio ar y daliad—

- (a) symud ymlaen i'r cam dodwy neu i'r uned ddodwy; a
- (b) cyrraedd diwedd y gylchred gynhyrchu.

(2) Rhaid i'r meddiannydd hysbysu'r Cynulliad Cenedlaethol o leiaf ddwy wythnos cyn bod disgwyl i'r haid fridio symud ymlaen i'r cam dodwy neu i'r uned ddodwy.

### Samplu heidiau bridio

9.—(1) Rhaid i'r meddiannydd gymryd samplau o bob haid fridio ar y daliad ar yr adegau a ganlyn—

- (a) pan fo'r adar yn yr haid yn gywion;
- (b) pan fo'r adar yn yr haid yn bedair wythnos oed;
- (c) dwy wythnos cyn y dyddiad y mae disgwyl i'r haid ddechrau dodwy neu symud ymlaen i'r cam dodwy neu i'r uned ddodwy; ac
- (ch) bob ail wythnos yn ystod y cyfnod dodwy.

(2) Rhaid i'r gwaith samplu o dan baragraff 1(a) i (c) gael ei wneud yn unol ag Atodlen 2 i'r Gorchymyn hwn a rhaid i waith samplu o dan baragraff 1(ch) gael ei wneud yn unol â phwynt 2.2.2.1 o'r Atodiad i Reoliad y Comisiwn (samplu rheolaidd a digymell gan y gweithredydd).

### Anfon samplau i labordy a gymeradwywyd

10.—(1) Rhaid i'r meddiannydd anfon y samplau a gymerir o dan erthygl 9 i labordy a gymeradwywyd at ddibenion profi am bresenoldeb salmonela.

(2) Rhaid iddo anfon y samplau o fewn—

- (a) 24 o oriau ar ôl eu cymryd; neu
- (b) o fewn 48 o oriau ar ôl eu cymryd os yw'n gosod y samplau mewn oergell ar dymheredd rhwng 1° a 4° C cyn gynted ag y bo'n ymarferol iddo wneud hynny ar y diwrnod y'u cymerir.

(3) Rhaid iddo sicrhau bod y samplau'n cael eu nodi cyn iddynt gael eu hanfon er mwyn galluogi'r labordy a gymeradwywyd i gadarnhau—

- (a) enw'r meddiannydd;
- (b) cyfeiriad y daliad lle y cedwir yr haid fridio y daeth y samplau ohoni;
- (c) y math o samplau;
- (ch) y dyddiad y cymerwyd y samplau;
- (d) dull adnabod yr haid fridio y daeth y samplau ohoni;
- (dd) oed yr haid fridio y daeth y samplau ohoni;
- (e) p'un ai haid o ddodwywyr fridwyr neu o fridwyr cig yw'r haid fridio y daeth y samplau ohoni; ac
- (f) statws yr haid fridio y daeth y samplau ohoni yn y pyramid bridio.

### Cofnodion samplau

11.—(1) Rhaid i'r meddiannydd—

- (a) cadw cofnod o'r wybodaeth a geir yn Atodlen 3, paragraff 1, mewn cysylltiad â phob sampl a gymerir yn unol ag erthygl 9; a
- (b) erbyn 30 Mehefin a 31 Rhagfyr bob blwyddyn, roi i Weinidogion Cymru yr wybodaeth honno mewn cysylltiad â samplu yr ymgymerir ag ef yn y chwe mis cyn ei hysbysu.

(2) Rhaid iddo gadw'r cofnod ym (1)(a) am ddwy flynedd ar ôl y dyddiad y cymerwyd y sampl.

### Cofnodion symudiadau

12.—(1) Rhaid i'r meddiannydd gadw cofnod o'r wybodaeth yn Atodlen 3, paragraff 2, mewn cysylltiad â symud i'r daliad neu o'r daliad unrhyw ffowls domestig o'r rhywogaeth *Gallus gallus* neu eu cywion neu eu hwyau.

(2) Rhaid iddo gadw'r cofnod am ddwy flynedd ar ôl dyddiad symud y ffowls.

### PENNOD 2

#### Dyletswyddau labordai a gymeradwywyd

### Dyletswyddau labordy a gymeradwywyd

13.—(1) Rhaid i'r person â gofal labordy a gymeradwywyd sicrhau bod y gwaith o archwilio samplau a anfonwyd iddo o dan erthygl 10 yn dechrau o fewn 48 o oriau ar ôl i'r samplau hynny ddod i law.

(2) Rhaid iddo sicrhau—

(a) bod y samplau'n cael eu paratoi fel a ganlyn—

(i) rhaid paratoi leinin blychau cywion yn unol ag Atodlen 4 i'r Gorchymyn hwn;

(ii) rhaid paratoi samplau o swabiau o esgidiau yn unol â phwynt 3.1.2 yn yr Atodiad i Reoliad y Comisiwn; a

(iii) rhaid paratoi unrhyw samplau eraill o ysgarthion yn unol â phwynt 3.1.3 o'r Atodiad hwnnw;

(b) bod y samplau'n cael eu profi am salmonela yn unol â'r dull a geir ym mhwynt 3.2 o'r Atodiad hwnnw; ac

(c) bod adroddiad ysgrifenedig ar ganlyniad unrhyw brawf ar unrhyw sampl yn cael ei roi i'r meddiannydd a anfonodd y sampl cyn gynted ag y bo'n ymarferol.

### PENNOD 3

#### Defnyddio asiantau gwrthficrobaidd a brechlynnau

### Gwahardd defnyddio asiantau gwrthficrobaidd

14. Ni chaiff neb roi unrhyw asiant gwrthficrobaidd i unrhyw aderyn mewn haid fridio o ffowls domestig o'r rhywogaeth *Gallus gallus* fel dull penodol o reoli salmonela a hynny'n groes i Erthygl 2 o Reoliad y Comisiwn 1177/2006 (defnyddio asiantau gwrthficrobaidd).

### Gwahardd defnyddio brechlynnau

15. Ni chaiff neb roi unrhyw frechlyn salmonela byw i unrhyw aderyn mewn haid fridio o ffowls domestig o'r rhywogaeth *Gallus gallus* yn groes i Erthygl 3(1) o Reoliad y Comisiwn 1177/2006 (defnyddio brechlynnau).

## RHAN 4

### Amrywiol

### Cofnodion deorfeydd

16.—(1) Rhaid i feddiannydd deorfa sydd â chyfanswm capasiti deor o 1000 neu fwy o wyau ac y mae ynnddi ffowls domestig o'r rhywogaeth *Gallus gallus* neu eu hwyau gadw cofnod—

- (a) o'r wybodaeth a geir yn Atodlen 3, paragraff 3, mewn cysylltiad â symud unrhyw wyau ffowls domestig o'r rhywogaeth *Gallus gallus* i'r ddeorfa ac oddi yno; a
  - (b) o'r wybodaeth geir yn Atodlen 3, paragraff 4, mewn cysylltiad â symud unrhyw gywion ffowls domestig o'r rhywogaeth *Gallus gallus* o'r ddeorfa.
- (2) Rhaid iddo gadw'r cofnod am ddwy flynedd ar ôl dyddiad symud y cywion.

### **Dangos cofnodion**

17. Rhaid i unrhyw berson y mae'n ofynnol iddo gadw cofnod o dan y Gorchymyn hwn ei ddangos i un o arolygwyr neu o swyddogion Gweinidogion Cymru pan ofynnir iddo wneud hynny ar unrhyw adeg resymol a rhaid iddo ganiatáu gwneud copi o'r cofnod neu o ddarn ohono.

### **Ymyrryd â samplau**

18. Rhaid i berson beidio ag ymyrryd â sampl neu beidio â gwneud unrhyw beth iddo sy'n debygol o effeithio ar ganlyniad unrhyw brawf y mae'n ofynnol ei wneud o dan y Gorchymyn hwn, ac eithrio fel y darperir ar ei gyfer yn y Gorchymyn hwn.

### **Pwerau Gweinidogion Cymru mewn achosion o fethu â chydymffurfio**

19. Os bydd unrhyw berson yn methu â chymryd unrhyw gamau o dan y Gorchymyn hwn, caiff arolygydd gymryd y cyfryw gamau neu beri iddynt gael eu cymryd, a bydd yn bosibl i Weinidogion Cymru adennill ei dreuliau y mae'n rhesymol iddo eu tynnu oddi wrth y person sydd wedi methu â chydymffurfio.

### **Gorfodi**

20.—(1) Mae'r Gorchymyn hwn i gael ei orfodi gan yr awdurdod lleol.

(2) Caiff Gweinidogion Cymru gyfarwyddo, mewn perthynas ag achosion o ddisgrifiad penodol neu unrhyw achos penodol, y bydd y Gorchymyn hwn yn cael ei orfodi gan y Cynulliad Cenedlaethol ac nid gan yr awdurdod lleol.

### **Dirymu**

21. Caiff Gorchymyn Heidiau Bridio Dofednod a Deorfeydd 1993(4) ei ddirymu o ran Cymru.

13 Mehefin 2007

*Jane Davidson*  
Y Gweinidog dros Gynaliadwyedd a Datblygu  
Gwledig, un o Weinidogion Cymru.

## ATODLEN 1

Erthyglau 4 a 5

### Gwybodaeth am ddeorfeydd a heidiau bridio

#### Gwybodaeth mewn perthynas â deorfeydd

1. Yr wybodaeth sydd i'w rhoi yw'r canlynol—
  - (a) enw, cyfeiriad a Rhif ffôn y meddiannydd;
  - (b) cyfeiriad a Rhif ffôn y ddeorfa;
  - (c) capasiti deor y ddeorfa; ac
  - (ch) rhywogaeth y dofednod a gaiff eu deor yn y ddeorfa.

#### Gwybodaeth mewn perthynas â heidiau bridio

2. Yr wybodaeth sydd i'w rhoi yw'r canlynol—
  - (a) enw, cyfeiriad a Rhif ffôn y daliad;
  - (b) enw, cyfeiriad a Rhif ffôn y meddiannydd a'r person sydd piau pob haid fridio ar y daliad;
  - (c) nifer yr heidiau bridio ar y daliad;
  - (ch) dull adnabod pob haid fridio ar y daliad;
  - (d) y rhywogaethau ym mhob haid fridio ar y daliad;
  - (dd) nifer y dofednod ym mhob haid fridio ar y daliad;
  - (e) p'un ai ddodwywyr fridwyr neu fridwyr cig yw'r dofednod ym mhob haid fridio ar y daliad; ac
  - (f) statws pob haid fridio ar y daliad yn y pyramid bridio.

## ATODLEN 2

Erthygl 9(2)

### Samplu heidiau bridio

#### Samplu cywion

- 1.—(1) Mae'r samplau canlynol i'w cymryd pan fo'r adar yn gywion—
  - (a) 1 leinin blychau cywion, hyd at uchafswm o 10, ar gyfer pob 500 o gywion a ddanfonir o'r ddeorfa; a
  - (b) carcass pob cyw, o bob deorfa, hyd at uchafswm o 60, sydd wedi marw erbyn cyrraedd y daliad.
- (2) Yn y paragraff hwn, ystyr "leinin blychau cywion" ("*chick box liner*") yw unrhyw ddeunydd a ddefnyddir i leinio blwch neu gynhwysydd arall y caiff cywion eu cludo ynddo o'r ddeorfa i'r daliad.

#### Samplu adar pedair wythnos oed etc.

- 2.—(1) Mae'r samplau canlynol i'w cymryd o bob haid o adar pedair wythnos oed a phob haid ddwy wythnos cyn i'r haid ddechrau dodwy neu symud ymlaen i'r cam dodwy neu i'r uned ddodwy—
  - (a) swabiau o isafswm o ddau bâr o esgidiau; neu
  - (b) sampl gyfansawdd o ysgarthion.

**Statws** This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

(2) Yn y paragraff hwn, ystyr “sampl gyfansawdd o ysgarthion” (“*a composite faeces sample*”) yw sampl o ysgarthion sy'n nifer o samplau unigol sydd wedi'u cyfrifo'n unol â'r Tabl canlynol, ac y mae pob un ohonynt yn pwyso nid llai nag 1 gram, ac sydd wedi'u cymryd o safle a ddewiswyd ar hap i gynrychioli'r adeilad neu'r grwp o adeiladau ar y daliad lle y cymerwyd y sampl.

### Tabl

Mae nifer y safleoedd lle y mae samplau ar wahân o ysgarthion i'w cymryd er mwyn gwneud sampl gyfansawdd fel a ganlyn—

<i>Nifer yr adar a gedwir yn yr adeilad</i>	<i>Nifer y samplau o ysgarthion sydd i'w cymryd yn yr adeilad</i>
1—24	Nifer sy'n hafal i nifer yr adar, hyd at uchafswm o 20
25—29	20
30—39	25
40—49	30
50—59	35
60—89	40
90—199	50
200—499	55
500 neu fwy	60

## ATODLEN 3

Erthyglau 11, 12 a 16

### Gofynion cadw cofnodion

#### Samplau

1. Yr wybodaeth sydd i'w chofnodi yw'r canlynol—
  - (a) y math o sampl a gymerir;
  - (b) y dyddiad y cymerwyd y sampl;
  - (c) dull adnabod yr haid fridio y daeth y sampl ohoni;
  - (ch) oed yr haid fridio y daeth y sampl ohoni;
  - (d) y labordy a gymeradwywyd lle yr anfonwyd y sampl; ac
  - (dd) canlyniad unrhyw brawf ar unrhyw sampl y rhoddwyd adroddiad arno i'r meddiannydd yn unol ag erthygl 13(2)(c).

#### Symudiadau ffowls domestig o'r rhywogaeth *Gallus gallus* i ddaliadau ac oddi yno

2. Yr wybodaeth sydd i'w chofnodi yw'r canlynol—
  - (a) dyddiad symud;
  - (b) nifer y ffowls domestig, y cywion neu'r wyau a symudir;
  - (c) oed y ffowls domestig neu'r cywion a symudir;



- (ch) yn achos symud haid fridio gyfan o ffowls domestig, dull adnabod yr haid honno;
- (d) manylion adnabod yr adeilad neu'r grŵp o adeiladau lle y gosodwyd unrhyw ffowls domestig, cywion neu wyau a symudwyd i'r daliad, neu y symudwyd ffowls domestig, cywion neu wyau ohono o'r daliad;
- (dd) yn achos unrhyw ffowls domestig, cywion neu wyau a symudwyd i'r daliad, y cyfeiriad y symudwyd hwy ohono i'r daliad; ac
- (e) yn achos unrhyw ffowls domestig, cywion neu wyau a symudwyd o'r daliad, y cyfeiriad y symudwyd hwy iddo.

### **Symud wyau i ddeorfa ac ohoni**

- 3. Yr wybodaeth sydd i'w chofnodi yw'r canlynol—
  - (a) dyddiad symud;
  - (b) nifer yr wyau a symudwyd;
  - (c) cyfeiriad y mangreoedd y symudwyd yr wyau ohonynt, yn achos wyau a symudwyd i'r ddeorfa; ac
  - (ch) cyfeiriad y mangreoedd y symudwyd yr wyau iddynt, yn achos wyau a symudwyd o'r ddeorfa.

### **Symud cywion o ddeorfa**

- 4. Yr wybodaeth sydd i'w chofnodi yw'r canlynol—
  - (a) dyddiad symud;
  - (b) nifer y cywion a symudwyd; ac
  - (c) cyfeiriad y mangreoedd y symudwyd y cywion iddynt.

ATODLEN 4

Erthygl 13(2)(a)(i)

Paratoi leinin blychau cywion

### **Paratoi'r samplau**

Rhaid paratoi leinin blychau cywion fel a ganlyn—

- (a) cyfran o isafswm o 1 gram i'w chymryd o ran wedi'i baeddu ar bob leinin; a
- (d) rhaid i'r cyfrannau o wahanol leininau gael eu gwasgu gyda'i gilydd a'u rhoi mewn Dwr Pepton Byfferog (BPW) ar raddfa o nid mwy nag 1 gram o leinin i bob 10 ml o BPW.

*Statws* This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

## EXPLANATORY NOTE

(Nid yw'r nodyn hwn yn rhan o'r Gorchymyn)

Mae'r Gorchymyn hwn yn dirymu ac yn ail-wneud Gorchymyn Heidiau Bridio Dofednod a Deorfeydd 1993 (O.S. 1993/1898).

Mae Erthygl 4 yn ei gwneud yn ofynnol i feddiannydd deorfa ddofednod â chyfanswm capasiti deor o 1000 neu fwy o wyau hysbysu Gweinidogion Cymru. Mae Erthygl 5 yn ei gwneud yn ofynnol i feddiannydd daliad lle y cedwir heidiau bridio o 250 neu fwy o ddofednod hysbysu Gweinidogion Cymru.

Mae'r Gorchymyn yn rhoi ar waith y rhaglen reoli genedlaethol ar gyfer ffowls domestig o'r rhywogaeth *Gallus gallus*—

- (a) sy'n ofynnol gan Erthygl 5 o Reoliad (EC) Rhif 2160/2003 Senedd Ewrop a'r Cyngor ar reoli salmonela ac asiantau milddynol penodedig eraill sy'n ymledu drwy fwyd (OJ Rhif L325, 12.12.2003, t.1); a
- (b) a gymeradwywyd gan y Comisiwn Ewropeaidd yn unol ag Erthygl 6 o'r Rheoliad hwnnw.

Mae'r rhaglen reoli genedlaethol ar gael gan yr Is-dran Iechyd Anifeiliaid a Phlanhigion Llywodraeth Cynulliad Cymru, Parc Cathays, Caerdydd, CF10 3NQ.

Mae'r Gorchymyn yn gorfodi Rheoliad y Comisiwn (EC) Rhif 1003/2005 sy'n rhoi ar waith Reoliad (EC) Rhif 2160/2003 o ran targed Cymunedol ar gyfer gostwng nifer yr achosion o seroteipiau salmonela penodol mewn heidiau bridio o *Gallus gallus* ac sy'n diwygio Rheoliad (EC) Rhif 2160/2003 (OJ Rhif L 170, 1.7. 2005, t.12).

Mae erthyglau 6 i 12 yn gymwys i feddiannydd daliad lle y cedwir heidiau bridio o ffowls domestig o'r rhywogaeth *Gallus gallus*. Mae erthygl 7 yn ei gwneud yn ofynnol i'r meddiannydd hysbysu Gweinidogion Cymru bod heidiau bridio wedi cyrraedd y daliad ac mae erthygl 8 yn ei gwneud yn ofynnol iddo roi gwybod pan fydd yr heidiau hynny'n symud i'r cam dodwy neu i'r uned ddodwy a phan fyddant yn cyrraedd diwedd y gylchred gynhyrchu. Mae erthygl 9 yn ei gwneud yn ofynnol iddo gymryd samplau o'r heidiau hynny ac mae erthygl 10 yn ei gwneud yn ofynnol iddo anfon y samplau hynny i labordy a gymeradwywyd er mwyn eu profi am salmonela. Mae erthyglau 11 a 12 yn gosod gofynion cadw cofnodion ar y meddiannydd.

Mae erthygl 3 yn nodi dyletswyddau labordy a gymeradwywyd i baratoi a phrofi'r samplau ac i roi adroddiad ar y canlyniadau i'r meddiannydd.

Mae erthygl 14 yn gwahardd rhoi unrhyw asiant gwrthficrobaidd i ffowls domestig o'r rhywogaeth *Gallus gallus*, ac eithrio yn unol ag Erthygl 2 o Reoliad y Comisiwn (EC) Rhif 1177/2006 sy'n rhoi ar waith Reoliad (EC) Rhif 2160/2003 Senedd Ewrop a'r Cyngor o ran gofynion ar gyfer defnyddio mesurau rheoli penodol yn fframwaith y rhaglenni cenedlaethol ar gyfer rheoli salmonela mewn dofednod (OJ Rhif L212, 2.8.2006, t.3). Mae Erthygl 15 yn gwahardd rhoi unrhyw frechlyn salmonela byw i rywogaethau o'r fath, ac eithrio'n unol ag Erthygl 3(1) o'r Rheoliad hwnnw.

Mae Erthygl 16 yn gosod gofynion cadw cofnodion ar feddiannydd deorfa ddofednod.

Yr awdurdod lleol sydd i orfodi'r Gorchymyn. Mae peidio ag ufuddhau i'r Gorchymyn yn dramgwydd o dan adran 73 o Ddeddf Iechyd Anifeiliaid 1981 (p.22), ac mae'r gosb am hynny yn unol ag adran 75 o'r Ddeddf honno.

Mae asesiad effaith reoliadol a gaiff yr offeryn hwn ar gostau busnes ac ar y sector gwirfoddol ar gael o'r cyfeiriad uchod ac fe'i hatodir i'r Memorandwm Esboniadol sydd ar gael ochr yn ochr â'r offeryn ar wefan Swyddfa Gwybodaeth y Sector Cyhoeddus.

*Document Generated: 2023-08-19*

**Statws** *This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.*